


**Ni Presidente
Henry B. Eyring**
Umuna a Mammagbaga iti
Umuna a Panguluen



Tured iti Dayaw

Maysa kadagiti panggep ti biag iti daga ket isu ti panangpaneknek iti Dios a tungpalentayo dagiti bilinna no kasapulan dayta ti tured. Nalasattayo dayta a pannubok iti lubong dagiti espi-ritu. Ngem apagkatlo dagiti pangen ti langit ti nagrebelde a maibusor iti dayta a singasing a masubokda iti biag iti daga nga adda pagpeggadan a mabalin a pakapaayanda.

Sakbay a nayanaktayo, personal nga am-ammotayo ti Dios Ama ken ti Anakna, ni Jesucristo. Makitatayo Ida ken mangngegantayo Ida bayat ti panangisuro ken panangparegtada kadatayo. Ita naikabilen ti belo kadagiti panunot ken lagiptayo. Adda gundaway ni Satanas, ti ama dagiti inuulbod, gapu ta nasken a makitatayo ti kinapudno ti kinasiasinotayo babaen dagiti mata ti pammati, idinto ta dagiti bagitayo ti mangpapadas kadatayo iti nailubongan a sulisog ken iti pagkapsutan ti bagi.

Addaantayo kadagiti naindaklan a tulong a mangted kadatayo iti tured iti daytoy a biag. Ti kaindaklan ket ti Pannubbot ni Jesucristo. Gapu iti inaramidna, mabalin a maugasan dagiti basol kadagiti dandanum ti panagbuniag. Mapabarotayo dayta a bendision no makiranudtayo iti sakramento a sipapammati ken addaan iti managbabawi a puso.

Dagiti naespirituan a sagut ti sabali pay a tulong. Awatentayo ti Espiritu ni Cristo iti pannakayanak. Dayta ti mangted kadatayo iti bileg a mangammo no ti pili a

sangsanguentayo ket mangiturong iti agnanayon a biag. Dagiti nasantuan a kasuratan ti masinunuo a pangiwawanwan no basaentayo dagitoy a ti Espiritu Santo ti kaduatayo.

Palugodannatayo ti Espiritu Santo a mangyebkas iti panagyaman ken dumawat iti tulong babaen iti kararag nga addaanan iti kinalawag ken panagtalek a naminsan a sinagraptayon iti denna ti Nailangitan nga Amatayo ken addanto manen kadatayo no agsublitayo Kenkuana. Dayta a pannakisarita iti Dios ket mangtulong a mangikat iti buteng iti puspusotayo bayat ti panangparnuayna iti pammati ken ayat ti Nailangitan nga Ama ken ni Jesucristo.

Ti nasantuan a priesthood ket mangted kadatayo iti tured iti panagserbitayo. Kadagiti ordinansana awatentayo ti bileg tapno agserbi kadagiti annak ti Dios ken tapno masarkedan ti impluwensia ti sairo. No awaganatayo Isuna tapno agserbi, addaantayo iti daytoy a kari: “Ket asino man a mangawat kadakayo, addaakto met sadiay, ta addaakto iti sangoyo. Addaakto iti makana-wanyo ken iti makanigidyo, ket addanto ti Espirituk iti puspusoyo, ket likmutendakayonto dagiti anghelko, a mangtarabay kadakayo” DkK 84:88).

Ti Propeta Joseph Smith iti panagserbina ket adda gapu iti panagbutengna. Ngem inikkan isuna ti Dios iti tured nga addaan iti daytoy a namnama ti pagwadan ti Maestro:

“Ket no maipisokkanto iti abut, wenna kadagiti ima dagiti mammapatay, ket maipataw kenka ti patay; no maipuruakka iti nauneg; ket no pagaambonandaka ti um-umkis a dalluyon; no agbalin ti kabusormo a narung-sot nga angin; no agdalungdong ti langit iti sipnget, ket amin a banag agkukunsabo a mangbangon iti dalanmo; ken kangrunaan ti amin, no dagiti yo ti impierno unga-pondanto ti ngiwatda a mangalun-on kenka, ammuem anakko, nga amin dagitoy a banag ipaayandaka iti padas, ket agbalindanto a pagsayaatam.

“Ti Anak ti Tao bimmaba iti babaenda amin. Nain-indaklan ka kadi ngem isu?” DkK 122:7–8).

Inikkannatayo ti Dios iti ad-adu pay a tulong a mangikkat iti buteng ket ikkannatayo iti tured, ania man ti mabalin a pakaisanguantayo iti biag. Bayat ti panagkalikagumtayo nga agpatulong Kenkuana, maitag-aynatayo nga agturong iti agnanayon a biag a kalkalikagumantayo a gun-oden.

PANANGISURO MANIPUD ITI DAYTOY A MENSAHE

Ni Jesucristo, ti Maestro a Mannursuro, ket masansan nga agsaludsod tapno allukoyenna dagiti tao a mangutob ken mangyaplikar kadagiti pagbatayan nga Insurona. . . . Dagiti saludsodna ket nangguyugoy iti panunot, panagsapsapul ti kararua, ken panagkumit” (*Teaching, No Greater Call* [1999], 68). Ibilang ti panangparnuay ken panangdamag iti sumagmamano a saludsod a makatulong kadagiti tao a mangawat ken mangyaplikar iti biagda kadagiti kinapudno a naisuro iti daytoy a mensahe. Kas pagarigan, mabalinmo a saludsoden ti, “Ania ti tulong nga inted kenka ti Dios a nangikkat iti buteng ken nangted kenka iti tured?” wenna “Kasano a tinulongannaka ti Dios a nangparmek kadagiti butengmo?” Allukoyem dagiti tao nga utobenda dagiti sungbatda sakbay a sumungbatda.

AGTUTUBO

Awan ti Tao a Perpekto

Ni Shauna Skoubye

Kanayon a tinarigagayak ti agbalin a kas ken ni Nephi: napnuan unay iti kinatunog, napnuan unay iti kinapudno, ken napnuan unay iti kinaespirituanna. Iti imatangko ni Nephi ket isu ti kaindaklan a pagwadan

ti kinaimbag. Sumagmamano a banag ti nakay-aywak ngem ad-adda a pinanunotko ti dumakel nga agbalin a kas kenkuana—wenna uray koma laeng matagikuak ti sangkabassit ti kinalaingna.

Maysa nga aldaw naaddaanak iti bassit a parikut, a gapuanan dagiti rikna ti kinakurang. Addaanak kadagiti kasta nga arapaap ken nakaad-adu a panggep a tunoyen. Ngem kasla diak latta makadanon iti papanak. Babaen dagiti lua ti kinaawan ti namnama, inyebkasko dagitoy a riknak ken ni tatangko. Dagus a timmakder isuna, napan iti pagidulanan ti libro, ket inruarna ti maysa kadagiti kopia ti Libro ni Mormon. Awan ti saona, linukibna daytoy iti 2 Nephi 4 ket inrugina ti panangbasa iti bersikulo 17.

Kasla koriente a nagsaknap ti lamiis iti bagik bayat idedengngegko kadagitoy nabileg a balikas: “O nakakaasiak a tao!” Adu dagiti napanunotko. Kasano a makuna ni Nephi, ti bannuarko ken pagwadak, nga isu ket “nakakaasi”? No isu ket nakakaasi, ania ti inaramid dayta kaniak?

Manen, pimnardas ti panagsaknap ti koriente iti kaunggak bayat ti panangbasa ni tatangko iti bersikulo 8: “Agringka, kaunggak! Saanka nga agnunog iti basol.” Nariknak a kasla nagawan dagiti nangisit nga ulep iti panunotko ket limmawag tapno makita ti bara ken ngayed ti nawada nga asul a langit ken naraniag nga init. Saan a mabalin nga iladawan no kasano ti pananglawag daytoy a bersikulo iti kaunggak. Sumagmamano a bersikulo ti nasantuan a kasuratan ti nangpunno kaniak iti adu a namnama, pammaregta, ken rag-o a kas iti inaramid kaniak daytoy.

Iti bersikulo 30, sinao ni Nephi ti kas met iti pinapanunotko, ngem iti nalawlawag a balikas: “Arag-o kenka ti kaunggak, Diosko, a pondasion ti pannakaisalakanko.” Daytoy a bersikulo ket nangibuyog kadagiti rikna ti talna ken panagyaman iti nadungngo nga asi ken ayat ti Apo.

Inrikep ni tatangko ti libro ket inlawlawagna a no dadduma ket maaw-awagan iti salmo ni Nephi dagitoy a bersikulo. Kalpasanna sidudungngo nga insurona kaniak nga uray dagiti kaindaklan a tao iti daga ket saan a perpekto wenna adda pagkuranganda, ket nasken a bigbigen dagitoy a tao dagiti pagkuranganda wenna no saan agbalinda a natangig, ket ngarud, saanda a naindaklan.

Naawatakon. Saan a gapu ta addaanak iti pagkapsutan saanna a kayat a sawen a diak kabaelan ti agbalin a kas ken ni Nephi. Ti panangbigbigko iti pagkapsutak ti ad-adda a nangyasiddeg kaniak iti kabaelan ni Nephi. Naindaklan ni Nephi gapu ta, malaksid iti panagbalinna a natulnog ken napudno, napakumbaba ken sitatallugod pay nga inakona dagiti biddutna.

Manipud pay iti dayta a padas, impategkon dagitoy a balikas ni Nephi. Tunggal kanito a basaek dagitoy, mapadasak dagiti isu met la a regget ken pammaregta idi immuna a binasak dagitoy. Ikanta dagiti bersikulo a maysaak nga anak a babai ti Dios, dakdakkal ti kabaelak ngem iti maipagarupko. Ammok a no napudnoak ket agtultuloyak, adda dagiti di pay naipalgak a parabor nga agur-uray kaniak.

ANNAK

Dagiti Sagut a Mangted Kadatayo iti Tured

Ibaga kadatayo ni Presidente Eyring maipapan iti sumagmamano a sagut a mangted kadatayo iti tured. Basaen ti tunggal nasantuan a kasuratan iti baba, ken isurat ti nagan ti sagut iti blangko. Kasaritam ti pamiliam maipapan no kasano a makaited iti tured kenka dayta a sagut.

1. Dagiti Aramid 22:16 _____
2. 2 Nephi 4:15 _____
3. DkK 59:8–9 _____
4. 2 Nephi 32:5; Juan 14:26–27 _____
5. 1 Taga-Tesalonica 5:17 _____

Panangpapigsa iti Pammati iti Dios nga Ama ken ni Jesucristo babaen ti Bukod a Panagadal iti Nasantuan a Kasuratan



Isuroyo dagitoy a nasantuan a kasuratan ken adaw a sao wenno,

no kasapulan, ti sabali pay a pagbatayan a mangbendision kadagiti kabsat a babbai a sarungkaranyo. Iburayyo ti pammaneknek maipapan iti doktrina. Awisenyo dagiti sarungkaranyo nga iburayda no ania ti narikna ken nasursuroda.

“Idi kabarbaroak pay la a nagasawa, . . . naawisak iti maysa a pangaldaw para iti amin a kabsat a babbai ti Relief Society iti wardko a nakapagbasan iti Libro ni Mormon wenno maysa a libro ti ababa a pakasaritaan ti Simbaan. Saan a kanyon ti panagbasak idi iti nasantuan a kasuratan, isu nga inaramidko ti kabaalak tapno makadar-ayak iti pangngaldaw babaen ti panagbasak iti ababa a libro gapu ta nalaklaka daytoy ken bassit ti oras a mabubos. Bayat ti pannanganko, adda nariknak a bileg a nupay nasyaat a basaen ti libro ti pakasaritaan, masapul koma a binasak ti Libro ni Mormon. Al-allukoyennak ti Espiritu Santo a baliwak dagiti ugalik iti panagbasa iti nasantuan a kasuratan.

Iti dayta met la nga aldaw rinugiak a binasa ti Libro ni Mormon, ket diak pulos nagsardeng. . . . Gapu ta inrugik ti panagbasa kadagiti nasantuan a kasuratan iti inaldaw, nasursurok ti maipapan iti Nailangitan nga Amak, ti Anakna a ni Jesucristo, ken no ania ti kasapulak tapno agbalinak a kas Kadakuada. . . .

“ . . .Kabaelan ti tunggal babai ti agbalin a mannursuro iti doktrina ti ebanghelio iti pagtaenganna, ket kasapulan ti tunggal kabsat a babai iti Simbaan ti pannakaammo iti ebanghelio kas maysa a lider ken mannursuro. No diyo pay naipaugali ti panagbasa iti nasantuan a kasuratan iti inaldaw, rugianyo itan ket itultuloyyo ti panagadal tapno nakasaganakayo kadagiti pagrebbenganyo iti daytoy a biag ken kadagiti kinaagnanayon.”¹

Julie B. Beck, *sapasap a presidente ti Relief Society.*

“Ti panagadal kadagiti nasantuan a kasuratan ket mangtulong kadagiti pammaneknektayo ken kadagiti pammaneknek dagiti miembro ti pamiliatayo. Dumakdakkal dagiti anaktayo iti agdama a napalikmutan kadagiti timek a mangguyuguyog kadakuada a bay-andan dayta nga umno ket gun-odenda, ketdi, dagiti pagragsakan ti lubong. Malaksid no

DAGITI TULONG PARA ITI VISITING TEACHING

Bayat ti isasarungkaryo, sungbatanyo dagiti saludsod ket mangiburay kadagiti nalawag a pannakaammo nga usaren dagiti nasantuan a kasuratan. Iburayyo ti pammaneknek maipapan iti no kasano a pinapigsa ti pammatiyo ti panagadalyo iti nasantuan a kasuratan. Kiddawenyo iti kabsat a babai a sarungkaranyo nga isalaysayna no kasano a napapigsan ti pagtaengan ken pamiliana ti panagadalna kadagiti nasantuan a kasuratan.

BUKOD A PANAGSAGANA

Juan 5:39

2 Timoteo 3:14–17

2 Nephi 9:50–51; 31:20; 32:3–5

DkK 138:1–11

addaandan ti natibker a pundasion iti ebanghelio ni Jesucristo, pammaneknek iti kinapudno, ken determinasion nga agbiag a sililinteg, alistoda a maaringan kadagitoy nga impluwensia. Pagrebbengantayo ti mangpapigsa ken mangsaluad kadakuada.”²

Presidente Thomas S. Monson.

“Kayatmi nga adu ti ammo dagiti kakabsattayo a babbai maipanggep kadagiti nasantuan a kasuratan. . . . Kasapulanyo ti pannakaammo kadagiti agnanayon a kinapudnona para iti bukodyo a pagimbagan, ken para kadagiti panggep ti panangisuroyo kadagiti bukodyo nga annak ken

amin a dadduma pay nga umay iti sakup ti impluwensiayo.”³

“Kayatmi a maparaburan dagiti pagtaengantayo kadagiti kabsat a babbai a nalaing iti nasantuan a kasuratan—baro ken balasang wenno naasawaan man, ubing wenno lakay,

balo wenno sibibiag man iti maysa a pamilia. . . . Agbalinkayo nga iskolar wenno nalaing kadagiti nasantuan a kasuratan—a saan a tapno mangibaba kadagiti dadduma, ngem ketdi mangitag-ay kadakuada!”⁴

Presidente Spencer W. Kimball (1895–1985).

DAGITI NAGADAWAN

1. Julie B. Beck, “My Soul Delighteth in the Scriptures,” *Liahona*, Mayo 2004, 107–9.
2. Thomas S. Monson, “Three Goals to Guide You,” *Liahona*, Nob. 2007, 118.
3. Spencer W. Kimball, “Privileges and Responsibilities of Sisters,” *Ensign*, Nob. 1978, 102.
4. Spencer W. Kimball, “The Role of Righteous Women,” *Ensign*, Nob. 1979, 102.